

83. Urteil in einem Streit über das Fischen in den Gräben am Greifensee 1569 Dezember 14

Regest: Bürgermeister und Rat der Stadt Zürich beurkunden einen Streit zwischen Niklaus Huser aus Fällanden sowie Klaus Pfister und seinen Brüdern aus Greifensee über das Fischen in den Gräben am Greifensee. Huser klagt, dass die Gebrüder Pfister in ihrer Wiese am Greifensee einen Graben angelegt haben und darin mit Reusen fischen, sodass sie ihm als Inhaber der Fischenz die Fische wegfangen. Nachdem eine Delegation des Rats vor Ort einen Augenschein genommen hat, urteilt der Rat, dass keine neuen Gräben bewilligt werden. Die Gebrüder Pfister sowie Ulrich und Klaus Ochsner müssen ihre erst kürzlich erstellten Gräben daher wieder zuschütten. Weiterhin bestehen bleiben dürfen die älteren Gräben, die auch als Grenze gedient haben, nämlich der oberste Graben, der Thomann Ochsner gehört und der Altfriedgraben genannt wird, sowie der unterste Graben, den Erhard Meier und seine Brüder von Fällanden besitzen und der Altglattgraben genannt wird. Hier dürfen die jeweiligen Besitzer ausserhalb der Schonzeiten weiterhin fischen und die Fische verkaufen. Die Aussteller siegeln mit dem Sekretsiegel.

Kommentar: Die Uferzone als Übergang von Land und Wasser war zwischen den Fischern und den Bauern ständig umstritten. Bereits 1549 hatten sich die Bürger von Greifensee beklagt, dass der Fischer Klein-Erhard Meier aus Fällanden mit seinen Fanganlagen ihr Weidegebiet in der Böschchen verwüste (PGA Greifensee I A 11; StAZH A 85, Nr. 10). Umgekehrt beklagte sich 1569 der Fischer Niklaus Hauser aus Fällanden, dass die Bauern aus Greifensee ihrerseits Fanganlagen erstellten und damit seinen eigenen Ertrag schmälerten. Darüber wurde am 1. September 1569 Kundschaft aufgenommen (StAZH A 85, Nr. 18), bevor der Rat am 14. Dezember das vorliegende Urteil fällte und damit bestimmte, dass die älteren Gräben bestehen bleiben und zum Fischfang genutzt werden dürfen, während die neu erstellten Anlagen zugeschüttet werden mussten.

Erneut zu Streit kam es 1749, weil sich die gewerbemässigen Fischer beklagten, dass die Bauern bei Überschwemmungen auf den Feldern Karpfen fingen und dadurch ihre Erträge schmälerten. Das Gericht urteilte, dass die Bauern dies weiterhin tun dürfen, sofern sie dafür kein Fischereiwerkzeug verwenden (SSRQ ZH NF II/3, Nr. 109).

Wir, burgermeister unnd rath der statt Zürich, thund khunndt menngklichem mitt disem brieff, als sich irrung unnd spann zugetragen zwüschennt Niclaußen Hußer von Fellannden einns unnd Claußen Pfister sampt synen brüderen von Gryffensee annderstheyls von deßwegen, das gemelter Niclauß Hußer sich mit sampt synem bystannd erclagt, das gedachter Clouß Pfister unnd syne brüderen inn irer wißen am Gryffensee, so glych by syner vischenntzen unnd fachen, so er im Gryffensee hette, gelägen were, einen graben gemacht, dieselbig damitt umbschlagen unnd bißhar beren daryn gesetzt unnd ime die visch vor synen fachen mitt söllichem unnd annderm züg darinn gefanngen. Unnd die-wyl aber syn vischenntzen von synem lieben vatter selligen thür erkoufft, ouch er die selbig von ime ererpt unnd dann der Pfistern fürnëmmen, damitt sy ime an dem vischfanng ein großen mercklichen schaden thätinnd, ein nüwerung, so vorhar nie gebrucht, so verhoffte er, das sy des vischenns unnd berensetzens genntzlichen abgewyßt werden solten. Wa inen der graben aber sonnst zu guttem irer wißen diennen, des möchte er inen wol gonnen.

Daruf Claus Pfister sampt synem bystannd für sich selbs unnd innamen syner brüderen antwurten laßen, das er unnd syne brüderen obangetzeigte wißen von irenn elteren ererpt unnd die selbig von wegen ville des wassers mitt

einem graben umbfaren müssen, ouch alwegen zu gepürlichen zythen beren
inn den selben graben gesetzt, visch darinn gefanngen unnd inen dasselbig nie-
mant gespert noch gewert. Unnd diewyl dann sölliche gerechtigkeit erblich an
sy kommen, ouch ire wißen gen Gryffensee unnd nit gen Fellannden gehordte,
5 so gethruwten sy, by sollichem alten harkommen zubelyben unnd des Hußers
vorderung unnd ansprach ledig erkennt zwerden.

Welliches spanns halb sy einannderen vor unnserm unndervogt unnd ge-
richt zu Gryffensee zu rächtvertigen unnderstannden unnd aber daselbs dan-
nenn für unns als die recht ordennlich oberhannd zu rechtlichem entscheyd
10 gewyßt. Unnd wann nun wir sy, die parthygen, inn obvermelter irer clag unnd
antwort, so sy mitt den unnd vil mer worten eroffnet, gnugsamlich gehördt unnd
ouch darnebennt verstannden, das die unnßern, Thoman, ouch Ulrich, deßgly-
chen Claus, die Ochßnern, sodenne Erhart Meyger unnd syne brüderen von
Fellannden glych der selben ennden inn iren wißen am Gryfensee ouch grä-
15 ben haben unnd das die Ochßnere ire besonders nüwlich gemacht, darinne
vischen unnd man sich ab den selbigen ouch erclage, habennt wir zu mererm
bericht aller hanndlung etlich von unnserm rath ußgeschossen unnd verordt-
net mitt dem bevelch, das sy hinuß gen Gryfensee keeren unnd daselbs aller
obgemelter personen gräben besichtigen, ouch derenhalben eigenntliche nach-
20 frag unnd erkonnidgunng haben unnd wie unnd wellichermaßen sy die sachen
gestaltet syn befinnden, unns desselben zuverstennidigen, unns volgenntz für-
rer harinne nach der gepür zehalten wüssind, wellichem unnßerm bevelch sy,
unnßere verordnetetenn mitreth, statt gethan.

Unnd als sy unns demnach aller sachen berichtet unnd wir ouch darauf ob-
25 vermelte personen jeden besonders inn synem fürwennden, wellicher gestalt
sy vermelte gräben gemacht unnd die an sy komen, sampt iren brieffen unnd
kunndtschafften gnugsamlich unnd nach aller nothurfft abermalen verhördt, ha-
bennt wir unns jüngst uff ir, der parthygen, gethanen rechtsatz zu recht erkennt
unnd gesprochen namlich:

30 Diewyl wir inn aller hanndlung befinnden, das der oberist graben, so Tho-
man Ochßner innhat, alwëgen gweßen unnd der Alt Fridgraben genempt wor-
den, ouch den weydtganng unnd etliche gütter zwüschennt denen von Gryffen-
see unnd Schwertzenbach scheydet, deßglychen das der unnderist graben, so
Erhart Meyger unnd syne brüderen von Fellannden besitzen unnd von inen
35 sampt der vischenntzen luth irer habenden brieff unnd siglen erkoufft, deßgly-
chen zu jedertzyth der Alt Glatgraben genempt unnd deren von Fellannden
unnd Schwertzenbach weydtganng unnd gütter von einanndern sonnderet, zu
dem das ouch inn söllich beiden gräbnen von inen, den innhaberen, bißhar
one inred gevischet worden, so sollen sy beydersydts by söllichen iren gräbnen
40 unnd altem harkomen fürer belyben.

Doch alßo unnd mitt sollicher erlütterung, das sy zu der zyth, das der visch im leych ist, als namlich von mittem appellen [16. April] biß zu ußgenndem meyen [31. Mai] (ald so der leych früger ald spätter syn wurde, das dann ein jeder unnßer vogt zu Gryffensee gwalt haben, ein inséchen zethunnd, sollich zill zekürzeren oder zuverlenngeren unnd inen maß unnd anleytung zegében, wie sy sich mitt dem vischen halten sollinnd, dem sy ouch als dann statt thun etc) mitt dheimem züg, wie dasselbig namen haben möchte, inn söllichen gräbnen gar nitt vischen, sonnder den visch, alle diewyl er im leych unnd brüt ist, ungefangen unnd rüwig lassen. Aber nach verschynung der selbigen zyth möginnd sy inn dißen beyden gräbnen wol vischen, doch ouch mitt dheimem anndern züg, dann wie der vischeinung zu Gryffensee dasselbig zulaßt, innhalt unnd vermag.

Unnd was sy ouch als dann für visch fachend unnd nitt inn iren hüßeren selbs bruchennd oder etwan einem irem nachpuren ein essen darvon, des sy dann gwalt haben, zekouffen gebent, die sollind sy alhar inn unnßer statt unnd sonnst niennderthin zu merckt tragen noch verkouffen, mitt dem heytern anhang, wellicher unnder inen wider das, so obstat, hanndle unnd ungehorsam erschine, der sölle jedes mals, so dick das beschicht, unns zechen pfunnd zu buß verfallen syn unnd von unnßern vögten zu Gryffensee von inen one nachlaß ingetzogen werden.

Deßglychen, das sy ouch inn söllichen beyden gräbnen dem wasser unnd visch den frygen yn- unnd ußganng laßen unnd daran dheim verhinnderung thun. Unnd so dann Toman Ochßner synen graben oben am schlund unnd ynganng vom Gryffensee umb etwas erwyteret, solle er den selben umb sovil widerumb yntzüchen unnd nitt breyter machen noch haben, dann wie er von alterhar gwëßen syge.

Sovil unnd aber die anndern dryg gräben, so zwüschennt obvermelten beyden gräbnen gelegen, antrifft, da namlich Ulrich unnd Clauß die Ochßner bekanntlich, das sy ire beyd gräben erst by kurtzer zyth nüwlich unnd Clauß Pfisters unnd syner brüderen graben vermog etlicher ingenomner kunndtschafft ouch erst by kurtzen jaren gemacht unnd merentheyls zu dem vischfang unnd sonnst zu dheimem sonnderen nutz ald unnderschidigung der gütteren diennent, so sölle die selben von inen drygen widerumb ingetzogen, ouch verwachßen laßen unnd der selben ennden dheim gräben mer gemacht noch geduldet werden, sonnder sy, die Ochßner unnd Pfistere, ire gütter daselbs innhaben unnd besitzen, wie die vor unnd eemalen dißere gräben alda gweßen, besessen worden sygen. Ouch by der peen unnd straff, der zechen pfunden buß, als obstat. Sonnst aber solle Niclauß Hußer by syner vischenntzen unnd fachen belyben wie von alterhar, von menngklichem unverhinnderet inn alweg, doch das er ouch mitt dheimem anndern züg darinn vische, dann wie der vischeinung inhalt unnd ußwyßt.

Alles inchrafft diß brieffs, daran wir des zu urkundt unnßer statt Zürich
secret insigel offennlich henncken laßen, mitwuchs, den viertzechennden tag
wolffmonats nach der gepurt Christi getzallt funnfftezenhundert sechzig
unnd nün jarr.

- 5 [Vermerk auf der Rückseite von Hand des 16. Jh.:] ^aUrthelbrief zwüschend^a Niclaußen
Hußer zu Fellanden ^bund den Pfisteren zu Griffensee, anno 1569^b
[Vermerk auf der Rückseite von Hand des 16. Jh.:] Urteilbrieff
[Vermerk auf der Rückseite von Hand des 18. Jh.:] Greiffensee

Original: StAZH C III 8, Nr. 3; Pergament, 58.5 × 27.0 cm (Plica: 6.0 cm); 1 Siegel: Sekretsiegel der Stadt
10 Zürich, Wachs, rund, angehängt an Pergamentstreifen, beschädigt.

Zeitgenössische Abschrift (Nachtrag): StAZH F II a 176, S. 179-182; Papier, 21.0 × 31.5 cm.

Abschrift: (1574 April 23) StAZH A 85, Nr. 23, S. 48-55; Papier, 21.5 × 31.5 cm.

Abschrift: (1574 April 23) StAZH C III 8, Nr. 31, S. 55-63; Papier, 16.0 × 20.5 cm.

Abschrift: (1738) StAZH B III 143, S. 43-56; Papier, 16.0 × 20.5 cm.

- 15 ^a Hinzufügung oberhalb der Zeile von anderer Hand.
^b Hinzufügung unterhalb der Zeile von anderer Hand.